



SLUŽBA ZA REVIZIJU FINANSIJSKOG POSLOVANJA

Na osnovu člana 14. stav 1. Zakona o finansiranju političkih stranaka («Službeni glasnik BiH» broj 22/00) i člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) izdajem

IZVJEŠTAJ O REVIZIJI
GODIŠNJEG FINANSIJSKOG IZVJEŠTAJA ZA 2006. GODINU I
POSTIZBORNOG FINANSIJSKOG IZVJEŠTAJA – OPŠTI IZBORI 2006.GODINE
HRVATSKE DEMOKRATSKE ZAJEDNICE BIH

Broj: 03-07-6-470/08

Sarajevo, 17.07.2008.godine

SADRŽAJ:

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije	5
Cilj revizije.....	5
Obim revizije.....	5
4. PRETHODNE REVIZIJE	5
5. NALAZI I PREPORUKE	6
5.1. NALAZI.....	6
5.2. PREPORUKE	7
KOMENTAR.....	7

MIŠLJENJE REVIZORA

- 1.1. Služba za reviziju finansijskog poslovanja u Centralnoj izbornoj komisiji Bosne i Hercegovine izvršila je reviziju finansijskih izvještaja za 2006.godinu **Hrvatske demokratske zajednice BiH** i to : godišnjeg finansijskog izvještaja za 2006.godinu i finansijskog izvještaja od dana podnošenja prijave za ovjeru za izbore do dana ovjere rezultata Opštih izbora održanih u oktobru 2006.godine. Revizija je ispitivala primjenu Zakona o finansiranju političkih stranaka i primjenu člana 15.10 Izbornog zakona Bosne i Hercegovine, od strane HDZ BiH.
- 1.2. Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.
Naša odgovornost je da izrazimo mišljenje na osnovu revizije koju smo izvršili.
- 1.3. Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka i članom 15.10 Izbornog zakona Bosne i Hercegovine.
- 1.4. Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka i članom 15.10 Izbornog zakona Bosne i Hercegovine.

Smatramo da revizija koju smo izvršili pruža razumnu osnovu za izražavanje našeg mišljenja.

Utvdili smo da Hrvatska demokratska zajednica BiH u izvještajnom periodu nije postupala u skladu sa odredbama člana 8. stav (1) i člana 11. stav (1) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaji ukazuju da je Hrvatska demokratska zajednica BiH u 2006. godini postupala u skladu sa Zakonom o finansiranju političkih stranaka i članom 15.10 Izbornog zakona Bosne i Hercegovine.

1. UVOD

Služba za reviziju finansijskog poslovanja u Centralnoj izbornoj komisiji BiH (u daljem tekstu: Služba za reviziju) je izvršila reviziju finansijskih izvještaja Hrvatske demokratske zajednice BiH i to: godišnjeg finansijskog izvještaja za 2006.godinu i finansijskog izvještaja za period od dana podnošenja prijave za ovjeru za izbore do dana ovjere rezultata opštih izbora održanih u oktobru 2006.godine.

Revizija je preduzeta u skladu sa članom 14. stav 1. Zakona o finansiranju političkih stranaka i članom 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2006. godinu Hrvatska demokratska zajednica BiH je iskazala ukupne prihode u iznosu od 1.985.491,17 KM, čija struktura je data u sljedećoj tabeli:

Red.br.	Vrsta prihoda	Iznos u KM	Učešće u uk.prih.
1	Članarina	95.051,60	4,79 %
2	Prilozi fizičkih lica	94.184,65	4,74 %
3	Prilozi pravnih lica	35.981,90	1,81%
4	Prihodi od imovine	12.900,61	0,65 %
5	Prihodi od pravnih lica	0,00	0,00%
6	Prihodi od poklona	10.786,57	0,54%
7	Prihodi iz budžeta	1.736.585,84	87,46%
	Ukupni prihodi:	1.985.491,17	100,00%

U periodu 01.01.-31.12.2006.godine HDZ BiH je iskazala ukupne rashode u iznosu od 1.951.903,72 KM.

2. PREDSTAVLJANJE POLITIČKE STRANKE

Naziv političke stranke: Hrvatska demokratska zajednica BiH. Skraćeni naziv stranke je HDZ BiH.

Hrvatska demokratska zajednica BiH osnovana je 1990.godine

Posljednja registracija: 16.5.2002.godine u Županijskom sudu u Mostaru, pod brojem 01/01.

Sjedište političke stranke je u Mostaru, ulica Kneza Domagoja bb.

U periodu koji je obuhvaćen revizijom za zastupanje Stranke bio je ovlašten Dragan Čović, predsjednik Stranke.

Lice ovlašteno za podnošenje finansijskih izvještaja za 2006. godinu je Marica Jurić.

Organizacionu strukturu HDZBiH čine:

- Središnjica HDZ BiH Mostar
- 9 županijskih odbora
- jedan gradski odbor
- 47 općinskih odbora
- Odbor Brčko Distrikta BiH.

3. OPIS REVIZIJE

Predmet revizije je godišnji finansijski izvještaj HDZ BiH za 2006.godinu i finansijski izvještaj za period od dana podnošenja prijave za ovjeru do dana ovjere rezultata opštih izbora održanih u oktobru 2006.godine, i to sljedećih organizacionih dijelova:

- Središnjica HDZBiH Mostar
- Općinskog odbora HDZBiH Široki Brijeg
- Općinskog odbora HDZBiH Travnik
- Općinskog odbora HDZBiH Vitez
- Općinskog odbora HDZBiH Zenica

Cilj revizije je da se prikupi dovoljno relevantnih dokaza kako bi se moglo izraziti mišljenje da li je HDZ BiH u izvještajnom periodu postupila u skladu sa odredbama Zakona o finansiranju političkih stranaka i poglavlja 15. Izbornog zakona Bosne i Hercegovine.

Obim revizije finansijskih izvještaja Hrvatske demokratske zajednice BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode iz budžeta, prihode od imovine i troškove kampanje.

4. PRETHODNE REVIZIJE

Izvršena je revizija godišnjeg finansijskog izvještaja za 2004. godinu i izdat izvještaj o reviziji sa mišljenjem revizora, nalazima i preporukom revizije da stranka treba postupati u skladu sa odredbama člana 6., člana 8. stav 1. i člana 11. stavova 1, 2, i 3. Zakona o finansiranju političkih stranaka. Takođe urađen je izvještaj o pregledu godišnjeg finansijskog izvještaja za 2005.godinu.

Realizovane preporuke:

Hrvatska demokratska zajednica BiH je ispoštovala preporuke iz Izvještaja o reviziji za 2004.godinu u dijelu koji se odnosi na prijavljivanje priloga (član 6.) i člana 11. stav (2) i (3) Zakona o finansiranju političkih partija.

Nerealizovane preporuke:

Na osnovu uočenih nedostataka u godišnjem finansijskom izvještaju za 2006.godinu, utvrđeno je da politička stranka nije ispoštovala sve preporuke koje su date u izvještaju o reviziji, i to: nije uspostavila jedinstveni registar članova, postupala je suprotno odredbama člana 8. stav (1) i člana 11 stav (1) Zakona o finansiranju političkih stranaka.

5. NALAZI I PREPORUKE

5.1. NALAZI

a) Na osnovu obavljene revizije u izabranim organizacionim dijelovima Stranke, utvrđeno je da HDZ BiH nije postupala u skladu sa odredbama člana 8. stav (1) Zakona o finansiranju političkih stranaka, odnosno da je primala zabranjene priloge.¹

- Općinski odbor HDZ BiH Široki Brijeg ima sklopljen ugovor sa Vodoprivrednim preduzećem „Lištica“ d.d. o zakupu poslovnog prostora. Mjesečni zakup iznosi 200,00 KM, odnosno za 2006. godinu zakupnina ukupno iznosi 2.400,00 KM.² Zakupnina se nije plaćala, i nije iskazana na obrascu 4-1.
- Općinski odbor HDZ BiH Zenica koristi povremeno poslovni prostor u zgradi bivšeg SSRN – a bez plaćanja zakupnine.³
- Općinski odbor HDZ BiH Vitez ima sklopljen ugovor o najmu poslovnog prostora sa Radio postajom Vitez. Prema članu 3. pomenutog ugovora nema obavezu da plaća zakupninu za prostor koji koristi.⁴

b) Na osnovu obavljene revizije finansijskih izvještaja, utvrđeno je da je stranka postupala suprotno odredbama člana 11. stav 1. Zakona o finansiranju političkih partija.⁵

- Stranka je u godišnjem finansijskom izvještaju na obrascu 3-a prikazala priloge fizičkih lica u ukupnom iznosu od 94.184,65 KM. Od pomenutog iznosa, prilozi preko 100,00 KM iskazani su u iznosu od 1.500,00 KM, dok su prilozi ispod 100,00 KM iskazani u iznosu od 92.684,65 KM. Za priloge fizičkih lica ispod 100,00 KM, stranka u svom knjigovodstvu ne raspolaže analitičkom evidencijom o donatorima- licima koji su dali priloge, kao ni o iznosima novca koji su isti darovali.⁶

Troškovi predizborne kampanje

Hrvatska demokratska zajednica BiH je postupila u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 460.520,00 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM⁷ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije Hrvatska demokratska zajednica BiH je mogla potrošiti 1.294.035,00 KM.

¹Državni, entitetski i kantonalni organi, organi općinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu finansirati političke stranke.

² Ugovor o zakupu poslovnog prostora između Vodoprivednog preduzeća „Lištica“ i OO Široki Brijeg od 30.01.2005.god.

³ Izjava predsjednika OO HDZ BiH Zenica o načinu korištenja poslovnog prostora od 03.travnja 2008.godine.

⁴ Ugovor o najmu prostorija između OO HDZ Vitez i Radio postaje Vitez sklopljen dana 01.05.2006.godine.

⁵ Poli tičke stranke su obavezne da u skladu sa članom 11. stav 1. Zakona vode evidenciju o svojim prihodima i rashodima.

⁶ Prema članu 6. Zakona o finansiranju političkih partija, prilozi jednog lica koji prelaze 100,00 KM moraju da se unesu u finansijski izvještaj. Stranka za priloge ispod 100,00 KM mora da ima u svom knjigovodstvu analitičku evidenciju- specifikaciju lica koja su dala priloge niže od 100,00 KM.

⁷ Član 15.10 stav 2. istog člana propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

5.2. PREPORUKE

Hrvatskoj demokratskoj zajednici BiH se preporučuje da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

➤ *da postupa u skladu sa odredbama člana 8. stav (1) i člana 11. stav (1) Zakona o finansiranju političkih stranaka i to:*

- da se ne finansira priložima koji su zabranjeni ovim zakonom, i*
- da vodi analitički evidenciju u knjigovodstvu o priložima fizičkih lica nižih od 100,00 KM*

KOMENTAR

U ostavljenom roku Hrvatska demokratska zajednica BiH se očitovala dopisom broj: I-02-20/08 od 13.06.2008. godine na Preliminarni izvještaj o reviziji godišnjeg finansijskog izvještaja za 2006. godinu i postizbornog finansijskog izvještaja – Opšti izbori 2006. HDZ BiH je 16.06.2008. godine dostavila dokumentaciju o postupku utvrđivanja ulaganja u adaptaciju i rekonstrukciju objekta koji koristi Središnjica stranke od strane sudskih vještaka. Iz dostavljene dokumentacije vidljivo je da se vodi spor između HDZ BiH i Grada Mostara, koji je pokrenut 2006.godine kod Općinskog suda u Mostaru. Predmet spora je utvrđivanje vrijednosti izvršenih radova na rekonstrukciji objekta koji je finansirala HDZ BiH i prebijanja istih sa obavezom plaćanja zakupnine Gradu Mostar. Obzirom da je u Preliminarnom izvještaju o reviziji godišnjeg finansijskog izvještaja za 2006.godinu i postizbornog finansijskog izvještaja HDZ BiH navedeno da je stranka primila zabranjene priloge u iznosu od 83.640,00 KM zbog neplaćanja zakupnine za ovaj prostor, i da je stranka dostavljenom relevantnom dokumentacijom argumentovano osporila nalaz revizije, primjedba stranke je uvažena i ugrađena u konačni Izvještaj o reviziji.

Ostale primjedbe stranke koje se odnose na korištenje poslovnog prostora od strane opštinskih odbora HDZ u Širokom Brijegu, Zenici i Vitezu nisu pravno argumentovane, te ih Služba za reviziju nije mogla uvažiti.

Služba za reviziju nije uvažila primjedbu stranke na nalaz u kojem je navedeno da je stranka prekršila odredbu člana 11. stav (1) Zakona o finansiranju političkih stranaka. Politička stranka je u skladu sa članom 11. stav (1) Zakona o finansiranju političkih stranaka dužna voditi evidenciju o svojim prihodima i rashodima, odnosno u svojim poslovnim knjigama treba imati kompletne evidencije u skladu sa računovodstvenim propisima, bez obzira na visinu prihoda i bez obzira da li ima obavezu da prihod prijavljuje u skladu sa članom 6. Zakona o finansiranju političkih stranaka.

Zahvaljujemo se ovlaštenoj osobi za podnošenje finansijskih izvještaja i zaposlenim u Središnjici Hrvatske demokratske zajednice BiH na dobroj i korektnoj saradnji tokom obavljanja revizije finansijskih izvještaja.

Hasida Gušić, šef Službe

Andan Nevenko, revizor

Anela Burdžović-Kapić, pomoćnik revizora